


't Herenhoentien



BESTE KIENDER!

Daor is dan weer jim Herenhoentien!
En waar gaon we et dit keer over hebben??

MAEK EEN WOORD DEUR DE LIJNEN
VANOF DE LETTERS TE VOLGEN.
TEKEN AN ET AENDE VAN DE LIJN
DIE LETTER NAO.
AJ' DAT BI'J ALLE LETTERS DAON
HEBBEN, STAOT D'R EEN WOORD.
WELK WOORD IS DAT?



Drie keer raoden... Knikkeren... Mis. Nog een keer.
Körfballen... Zowat goed, jim kommen al aorig in de
buurt...

Voetballen... RAEK! Dat is et... VOETBALLEN!!
Dat kan toch haost niet aandere?

Daorum is jim kraantien disse keer hielemaole mooi in
et oranje. En we hebben aliend mar dingen veur jim
bedocht en klaormaekt die mit et voetballen te maeken
hebben. Zo hebben we drie spellegies veur jim; iene
staot hiernaost en de aandere twieje staon op de
aachterkaante. Op de aachterkaante staon ok nog een
peer moppies.

In et verhael gaon Piepmoes en zien kammeraoden ok
een pottien voetballen, mar de wedstried moet inien
onderbreuken wodden, omdat... Now ja, dat heuren
jim wel as et verhael veurlezen wodt! En dan bin we
d'r nog niet, want bi'j 't Herenhoentien zit ok nog een
kleurplaete. Daorop ziej' Piepmoes die an et voetballen
is. Kleur die plaete mar zo mooi aj' kunnen!

Wi'j weensken jim vule plezier mit 't Herenhoentien,
mar ok een hiele fijne zommervekaansie!

PIEPMOES GAOT VOETBALLEN

(Een veurleesverhael van Sietske Bloemhoff)

Op een zommeraovend zit Piepmoes in de bos mit een peer van zien kammeraoden te praoten. Ze zitten onder een grote boom bi'j et eupen plak. Op et eupen plak bin een hieleboel dieren an et speulen. Een peer haezen doen haesien-over, een stel knienegies is an et knikkeren en een stok of wat jonge voegels bin an et touwgienspringen. Ze hebben allegere een protte wille, dat hebben jim vast wel deur!

Piepmoes en zien kammeraoden zitten d'r mit plezier naor te kieken.

'Wi'j kun douk ok wel even een spellegien doen,' vint et roodbossien. 'Ik heb d'r wel nocht an om me even uut te vliegen.'

'Now, en aandere ikke wel,' zegt de gelegouw. 'Et het de laeste daegen aorig waarm west, en dan doe'j niet zo vule. Dan is et, as et wat koeler is, wel lekker om je es evenpies flink te bewegen.'

Piepmoes is et d'r hielemaole mit iens. 'Ik heb d'r ok wel nocht an om wat spellegies te doen. Misschien bin d'r nog wel meer beesten die mitdoen willen. De protter misschien wel, en Diedel en Daweltien.'

'Aj' et over de duvel hebben,' gniest de doeve die d'r vanzels ok bi'j zit, 'trap ie him op zien stat. Kiek mar es even wie as daor anbiezen kommen. De honnen. En ze lieken wel dweildeurnat. Tsjonge, jonge, wat zien die beide gekken d'r uut.'

'Hee, Diedel en Daweltien,' ropt et roodbossien, 'wat hebben jim in de vredesnaeme daon. Hoe kommen jim zo nat, et het ja in gien tieden regend.'

'Of het jim baos jim onder de douche had,' sjilpt de gelegouw.

'Welnee,' blaffen de beide honnen, 'wi'j hebben krek even lekker zwommen in de Lende. En doe dochten we, we kun nog wel even op et eupen plak zien as daor nog wat te beleven vaalt. Wat bin jim aenlik an et doen?'

'Now,' zegt Piepmoes, 'wi'j zollen krek wat spellegies doen. Tikkertien, of overstikkertien of een spellegien mit de balle. Waor hebben jim zin an?'

'Wee'j wat ik graeg willen zol?' keft Diedel, 'ik heb d'r hatstikke vule zin an om es een pottien te voetballen. Wi'j hebben zowat alle wedstrieden van et WK bekeken, want oonze baos is gek op voetballen, zie. Wi'j zollen now aenlik zéls wel een keertien te voetballen willen, now Daweltien?'

'Jazeker,' antwoordt Daweltien. 'Soms speulen wi'j op et hiem ok wel es mit een oolde balle, mar echt voetballen hebben we nog nooit daon. Jim dan?'

Nee, de aandere dieren hebben ok nog nooit voetbald, en ze hebben d'r allegere wel nocht an.

'Ik heb wel een balle,' koerkt de doeve, 'ik hael him vot-en-daolik op.'

De aandere dieren bepraoten intied hoe ze voetballen gaon. Wie moet d'r in et doel, wie is de spits en wie gaot verdedigen en gao mar deur.

'Hoevule speulders hej' aenlik neudig veur een pottien voetballen,' vragt Piepmoes inienen.

'Elke ploeg het elf speulders,' vertelt Diedel. 'Tiene in et veld en iene in et doel.'

'Mar dan hewwe nog lange niet genoeg,' schrikken et roodbossien en de gelegouw. 'Tel mar. Wi'j beidend, Piepmoes, de doeve, Diedel en Daweltien, de protter en de molle.'

'Misschien wil Kukel de haene ok wel mitdoen,' bedaenkt Piepmoes. 'En de kikkerd, dan biwwwe al mit z'n tiene. Awwe now es iene van die haezen vraogen. Haezen kun hatstikke hadde lopen.'

De dieren vraogen een haesien en dat wil wel. Mar hi'j wil wel graeg dat zien beide vrunties ok mitdoen en ok de knienegies die an et knikkeren binnen. Dat bin ok vrunties van him.

'Dat kan best, want we moe'n toch ok een peer wisselspeulders hebben,' zeggen de beide honnen.

'Mar we hebben nog wel een aander perbleem. We moe'n een tegenperti'j hebben. En waor vienen we die. En een scheidsrechter moe'n we ok hebben.'

'Ik wil wel scheidsrechter wezen,' zegt de doeve, die intied de balle ophaeld het. 'En ik zorg wel veur een tegenperti'j. Ik hael zomtien Kukeltien op en onderwegens kom ik deur de bos daor de gelegouw hiel vroeger woonde. Daor wonen een hieleboel aorige dieren en die doen vast mit. Now, ik gao mitien die kaante op, zorgen jim intied veur een voetbalveld?'

Een uurtien laeter is alles klaor. De doeve is d'r weer, tegere mit Kukel die et uutkri'jt van plezier. De tegenperti'j is d'r ok. Et veld ligt d'r prachtig bi'j. Piepmoes en zien maoten hebben blauwe shirts an en de tegenperti'j rooien. Dan blaost de scheidsrechter op et fluitien. De wedstried kan beginnen. De dieren van de tegenperti'j gaon d'r mitien vandeur mit de balle. As midveur hebben ze een ree, en die kan verschrikkelik hadde lopen. As hi'j vlak bi'j et doel is en de balle die kaante op schopt, springt gelokkig de kikkerd mit een geweldigen sprong omhogens en kopt de balle hadde de ere kaant op. Daor komt Diedel an. Hi'j kan ok hadde. Moej' die hond lopen zien. Mit een handige tik schopt hi'j de balle naor Kukel die him mit een veurzettien deurtrapt naor Piepmoes die hielendal vri'j lopt! Piepmoes schopt zo hadde hi'j kan tegen de balle, en... goal! Ien-nul veur Piepmoes en zien kammeraoden. Et is een prachtige wedstried en et gaot aorig liek op. Daweltien, die in et doel van Piepmoes-en-die staot, lat de balle al een peer keer deur, mar gelokkig de ere kieper ok.

As et pauze is, is de staand drie-drie. Hiel spannend, mar de scheidsrechter zegt dat ze eerst wat mit mekaander drinken gaon. De beide perti'jen kun meraokel mit mekeer opschieten, mar nao een kertiertien gaot de wedstried weer deur. Wat kun die dieren allegere goed voetballen, jim moesten et zien kunnen! Alliend de molle lopt wel es de verkeerde kaante op, mar ja, die het ommes niet zokke goeie ogen. Now ja, dat hindert niks, vienen zien kammeraoden, iederiene moet mitdoen kunnen. En dan kieken zi'j ja wel wat beter. Mar as ze now alles wel zo goed zien... Ja, wat d'r óp et veld gebeurt wel, mar wat d'r náóst et veld an de haand is...

Aachter een peer kleine sparreboompies loeren vier ogen. Grune ogen. Katte-ogen, vanzels. Jim weten wel wie et binnen. Klaos de kaeter en Miep, zien vrundinnegien. De beide katten laggen in de buurt noflik te slaopen, doe ze een boel kebaol heurden.

'Wat zol dat wezen, Klaos,' knipoogt Miep tegen de kaeter.

'k Weet niet,' mompelt Klaos, 'en ie moe'n me niet altied wakker maeken as ik slaop.'

'Wanneer moe'k je dan wakker maeken, oolde sloegkop,' foetert Miep. 'Ik kan je ja alliend mar wakker maeken aj' slaopen!'

Klaos kikt Miep es gremietig an. Nuvere tutte, daenkt hi'j, mar hi'j zegt et mar niet. Eers hebben ze weer ruzie. Trouwens, al die geluden klinken naor dieren. Grote dieren, mar ok kleine dieren, en dat bin vast lékkere dieren... Moezen, bi'jveurbeeld.

'D'r op of, Miep,' mauwt Klaos. 'Misschien kuwwe wel een lekker stokkien vleis pakken.' Klaos is now springlevend. De beide katten sloepen hiel veurzichtig de kaante van de geluden op.

'Moej' now kieken,' blaost Miep. 'Al die lekkere happies bin an et voetballen. En ze zien vanzels niks eers as de balle. Wi'j hebben et veur et kiezen, Klaos.'

'Zeg dat wel,' bromt Klaos. 'Ik geloof da'k eerst Piepmoes mar es pak. En a'k die op heb, de protter. Of za'k krek eersomme...'

'Ik lus aandere Piepmoes ok wel,' mierkt Miep. 'Ik bin gek op moezehappies, waarom moet ie altied de moes.'

'Altied,' gromt Klaos, 'we hebben him ja nog nooit pakt, domme deuze daj' binnen. Mar veuruit, dan dielen we him. Dan kriegen we elk de helte. Mar let op, want daor komt hi'j krek weer an draeven. We griepen him in ienkeer en maeken dat we votkommen. As we op een rustig plakken binnen, eten we him heerlijk op.'

Et liekt niet best veur Piepmoes. Hi'j het vanzels nargens gien euvelmoed in en is van plan om nóg een doelpunt te maeken. Mar as hi'j vlakbi'j et doel is, vliegen inienen de beide katten et veld op en zullen him griepen.

'Help, hellup,' raost et aarme moesien. 'De katten willen me pakken, help, hellup.'

De katten hebben Piepmoes haost bi'j zien voetbalshirt vaaste. Mar dan komt inienen de ree van de tegenperti'j d'r an en buugt him veurover. Et bliekt dat hi'j een gewei het. Daor het hi'j an now toe hiel veurzichtig mit west, want hi'j was bange dat hi'j aandere de balle d'r mit lek stoten zol. Mar now bruukt hi'j et gewei wél. Hi'j stoot d'r mit naor veuren en prikt eerst Klaos percies in zien achterwark. De kaeter jammert en raost et uut, en vligt zo hadde hi'j kan van et voetbalveld of de bos in.

Dan dri'jt de ree zien kop naor Miep en zal die katte ok een beste por geven. Mar Miep zicht et geveer op 'e tied en vligt aachter Klaos an. Die beide kommen de eerste tied vast niet weer in de buurt! Dan fluit de scheidsrechter weer op et fluitien. Hi'j vint dat nao die vervelende onderbreking de wedstried toch nog even uutspeuld wodden moet. D'r kommen nog een peer doelpunten, mar et blift uiteindelik mit vuuf-vufe geliekspel. Gieniene vint dat echt arg. 'Weej' wat we doen,' stelt de doeve veur. 'Dommiet speulen we wéer een wedstried tegen mekeer. Mar dan kommen we wel naor jim bos toe, want dan hebben we temeensen gien last van de beide katten!'



ZUUK DE ACHT VERSCHILLEN




voetbalmoppen

Maik vragt an zien heit as hi'j aovens de WK-voetbalwedstried zien mag. Dat mag van heit, mar mar iene helte. 'Da's goed,' zegt Maik, 'as et dan mar de twiede helte is!'

Jeroen zegt tegen zien vruntien dat hi'j altied pech het. 'Hoezo dan,' vragt et vruntien. 'Za'k je vertellen,' zegt Jeroen. 'Zit ik zaoterdag in et stadion. Op et veld bin 22 man, en op de tribune 20.000. Uutgerekend ikke krieg de balle in mien gezicht!'

'Naor de wedstried west?' vragt Elma an Tom. 'Ja,' zegt Tom. 'Hoe is et oflopen?' 'Nul-nul.' 'En bi'j de rust?'

WELKE BALLE GAOT ET DOEL IN?



WK

2006